

Denzlinz:

Minzcuz Doxgiet Baenz Ranz Ndeu Caezhoz Doxgap Dingj Binghlah

田林：民族团结一家亲 同心协力抗疫情

Geij ngoenz doxriengz neix, Denzlinz Yen gak cuz ginzcung lumj ngvih sigloux baenzde doxgot ndaetndaet bae, soujmuengh doxbang, vunzlai caemh sim comz rengz, caezhoz doxgap dingj binghlah. Ndawdoz dwg 2 nyied 15 hauh gak cuz beixnuengx daengz Lozlij Cin camnai doengh boux youq giz ceiq naj fuengzgaemh binghlah.

(Biz Ci'gyangz/皮志强)



Liujcwngz: Gouj Cingz Doxhwnj Gunghyez Giyez Fuk Hong Swngchcanj

柳城：九成以上工业企业复工复产

Cietcieng gvaqlaeng, Liujcwngz Yen gak aen giyez hung doq fuengzgaemh binghlah doq guh swngchcanj, aen gonq aen laeng doxriengz fuk hong. Suenq daengz 2 nyied 18 hauh, daengx yienh 89 aen gunghyez giyez baenz gveihmoz fuk hong swngchcanj, 96% doxhwnj fuk hong gvaq. Ndawdoz dwg 2 nyied 15 hauh, boux gunghyinz ndeu youq ndaw cangj nyaengq hong.

(Dwng Gwzyiz/邓克轶 Veiz Cwngzcwngz/韦成成)



Yungzsuij: Ganbu Yangh Dungcuz Haeuj Ranz Lwnh Vunz Rox Cwngcwz Ciubing

融水：侗乡干部入户宣传征兵政策

Geij ngoenz doxriengz neix, gyoengq ganbu Yungzsuij Myauzcuz Swciyen Gunjbei Dungcuz Yangh yungh ndei duenhneix daihhagseng youq ranz gvaq cieng, dauqcawq lwnh vunzlai rox cwngcwz ciubing, iuheuh bouxcoz dangdieg haeuj bingdoi dangbing. Ndawdoz dwg ganbu yangh neix haeuj ranz lwnh gyoengq bouxcoz rox cwngcwz ciubing.

(Siz Yinzlieng/石银亮 Dwng Yizvaz/邓逸华)



Gojgaeq Dinj Minzcuz Doxgiet Baenaj Laeng Gvangjsih

广西民族团结进步小故事

Gvangjdungh Gvangjsih Baenz Beixnuengx Cauzsan Laujnungz Daeuj Soengq Bauj (Laj)

两广往来兄弟情 潮汕老农送宝来(下)

Daengz Gvangjsih le, Cauzsan laujnungz caeuq vunzlai dangdieg doxndei caemh youq, naih haemz naih hoj, guhvunz aekgvangq, rox maz son maz cienz gij gingniemh gohyoz ndaem naz hawj Gvangjsih nungzminz liuxcaez. Beijlumj boux Cauzsan laujnungz haeuj Canghvuz Yen Sizgyauz Gunghse Cuzveiz Swngchcanjdui, ndaem gyaj ngoenzde, mbwn nit lij doek fwn, bouxcoz riengz de naeuz: "Doek fwn gvaq, ngoenzcog caiq guh hix mbouj nguh!" Cauzsan laujnungz mboujdan

laemxsim laebdaeb guh, vanzlij caeuq gyoengq-de gangj: "Daih' it, gij gyaj ngoenzneix giemz, ngoenzneix mbouj ndaem roengz naz, caj daengz ngoenzcog cij ndaem couh sieng buek gyaj neix; daihngeih, gaiq naz ndeu ngoenz ndeu ndaem liux, cijndaej maj yinz, doxcaemh baenzhaeux, mboujnex couh miz camca, yingjyangj canjlieng; daihsam, ndaem naz aeu cadawz geiqciet, danghnaeuz bungz doek fwn couh mbouj ndaem, seizlawz cijndaej ndaem liux?" Baenzneix gangj

hawj bouxcoz riengz cungj fug de caez, ndaej son ndaej rox. Ciuq 1965 nienz gyoepsuenq, bide Gvangjsih daengx gih haeuxgok cungcanjlieng beij bi' gonq gyalai 12 ik lai gaen. Cauzsan laujnungz daeuj Gvangjsih cienz gingniemh gengndaem dwg gienh saeh hawj vunz yawjraen dangseiz daengx guek gak cuz yinzminz nyinhdoengz guekcoj hungmbwk, gaenxmaenx caeuqfaenh hwnqguh Cungguek Moq.

(Gvangjsih Minzcuz Yenzgiu Cunghsinh hawj gauj)